

Date – 22/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Nakum January thlaa Viksit Bharat Young Leaders Dialogue New Delhi-a Prime Minister hova neih tura Mizo tel tur te Sports & Youth Affairs Department in a thlang dawn.**
- 2. All India Radio Station Director leh Mizoram Cluster Head Pu DR Lalropuia'n tunlai thiamna hmanga hmasawna tam tak awm karah Radio chu mipui thinlungah ngaih pawimawh leh hlut ala hlawh reng a ti.**
- 3. Prime Minister Narendra Modia chuan hlawhtling taka ram pathum-Nigeria, Brazil leh Guyana te a tlawh hnuin khan Delhi a lo thleng**
- 4 Chhatisgarh-ah Maoists hel 10 sipaiten an kaphlum.**

<><><>

VIKSIT BHARAT

Nakum January thlaa Viksit Bharat Young Leaders Dialogue New Delhi-a Prime Minister Narendra Modi a hova neih tura Mizo tel tur te Sports & Youth Affairs Department in a thlang dawn.

He thu hi Sports dept Deputy Secretary Pi Marilyn Rualzakhumthangi chuan vawiin khan Aizawl Press Club-a chanchinbumite hmaah a puang a, tunkar tir lam khan Union Sports Minister Dr. Mansukh Mandaviya chuan Viksit Bharat Young Leaders Dialogue chu kumthar January ni 11 leh ni 12-ah buatsaih a ni dawn tih a puanzar tawh thu sawiin Ni hnih chung hian Prime Minister Pu Narendra Modi chuan thalai mi 3000 te New Delhi-a Bharat Mandapam-ah a kawm dawn a ti a. Hei hi India ramin ram intodelh, Viksit Bharat a nih theihna tura hmalakna pawimawh a nih thu leh, Prime Minister pawhin thalai hmahruaitu nuai 1 tal India ramin a neih theihna tura hmalakna a nih thu a sawi a ni.

Sports & Youth Affairs Deputy Secretary chuan he dialogue-a tel tur thlan dan tur sawifiahin round khatna atan tun thla ni 25 leh thla thar December ni 5 chungin All India Quiz Competition buatsaih a nih dawn a. Heta tling te hian round dang - essay ziah intihsiak leh state huap Viskit Bharat Vision insawisiak buatsaih a nih leh tur thu leh chung rounda tling te chu Prime Minister hoa hun hman turah an tlin dawn thu a sawi.

Mizo thalai a tam thei ang bera tel tura sawmin Pi Marilyn Rualzakhumthangi chuan Viksit Bharat thleng tura ram siam hna thawh

mekah Mizo thalai a tam thei ang berin tha an thawh ve theih nan he intihsiakna hmachhawn tur leh Viksit Bharat Young Leaders Dialogue-a tel tum ngei turin thalaite a sawm a ni.

Rit chawi chak Jeremy Lalrinnunga pawhin a thalai puite he Dialogue-a tel tura fuihin thalai kum 15 atanga kum 29 inkar te a tel theih thu leh, he hun tha hi chhuan lo awm zel tur ten hma an sawn theihna tura hmalakna pawimawh tak ni a a hriat thu a sawi a ni.

<><><>

SCHOOL EDUCATION MINISTER

School Education Minister Dr Vanlalhlanan zirna siamthat thawh chhoh mekah sikul naupang nei tlem sikulte chu a remchang apiang kaihkawp tum a ni a ti.

Vawiina a hova School Education Complex Conference hall-a School Education Department Quarterly Review meeting ah he thu hi sawiin Dr Vanlalhlana chuan School inspection tha taka kalpui a pawimawh thu leh tan lak a ngaih thu a sawi a, aikal lak chungchangah sorkar a kal tlang dawn a ni a ti bawk.

Minister chuan School sak leh thawmthat hnaah a nih dan anga kalpui a pawimawh a ti a, School-a thawkten bialtu DEO te hriatpui loh chuan lo tihdanglam a remchang lo a ni a ti bawk.

He review meeting-ah hian Education Consultant Rev Prof. Dr. K. Thanzauva pawhin thu a sawi a, School-ah class room-a zirtirna tihthat a tul thu leh tun dinhmun chu a tha tawk lo nia a hriat thu a sawi a. Zirtirna titha tur hian zirtirtuten lesson plan uluk takin siam se, chumi hmang chuan zirtirna kalpui se, class room zirtirna a that theih a beisei thu a sawi a. Sikul mamawh hi sorkarin a pe vek seng lova, khawtlang nen tanrual a ngai a ni a ti.

School Education review meeting-ah hian School Education Officer te, MBSE, SCERT, Samagra Shiksha officer-te leh Education Reform Committee member-te an tel a ni.

<><><>

AKASHVANI LUNGLEI

All India Radio Station Director leh Mizoram Cluster Head Pu DR Lalropuia'n tunlai thiamna hmanga hmasawna tam tak awm karah Radio chu mipui thinlungah ngaih pawimawh leh hlut ala hlawh reng a ti.

He thu hi vawiina Akashvani Lunglei Foundation Day vawi 30-na a hmanpui na ah sawiin Station Director chuan mipui thinlungah Radio chu hlut ala hlawh reng a ti a, Akashvani thawktute tunlai khawvela hmasawna hrang hrang hmang thiam a, Digital khawvela social media te chu hman tangkai

thiam a pawimawh tih sawiin thawktute hmasawn tuma ÷an lak a pawimawh tih a sawi.

Mizoram Cluster Head Pu DR Lalropuia chuan Akashvani Lunglei ah hmasawna a awm zel tih sawiin khawl ÷ha tak tak hmanga thuam chak zel a ni a ti a, hmasawna a awm zel theih nan technical staff 3 dah thuai an ni dawn a ti a, Akashvani Lunglei chu Mizorama FM Broadcasting Station hmasa ber a ni a ti a, FM dinchhuahna anih avangin Mizorama Radio FM hlutna chawinungtu an ni a ti bawk.

Doordarshan Kendra Director (News) Pu Nampibou Marinmai pawhin thusawiin Akashvani chuan an program hrang hrang hmangin mipui hriattur pawimawh alo puang chhuak ÷hin a ti a, hnam ziarang pholanna pawimawh tak ani tih sawiin mipui rin an hlawh zel theih nan theihtawp chhuah chhonzawm turin thawktute a chah a, Radio chu mi tin thleng phak anih avangin tunlai hmasawna awm chu hmang thiam a, thawhhona ÷ha tak nena chhonzawm zel turin a chah bawk.

Akashvani Lunglei-a Asst Director (Program) Pu Biakchungnunga pawhin thusawiin Lunglei mipui mai bakah chhim lamah Akashvani Lunglei chuan hlut ala hlawh hle a ti a, Social media lamah hmarchhak station hrang hrang zingah mipui ngaihhlut ber a ni mek tih a sawi.

Kum 1995-a din Akashvani Lunglei kum 30 tlin lawmna Akashvani Aizawl atangin thawktu mi 20 chuang he hun chhim tur hian an kal a, Field Station hrang hrang Champhai, Kolasib, Tuipang leh Saiha atangin an tel a, Akashvani Lunglei ah hian tun dinhmunah Regular staff 9 leh Casual Asignee 43 an awm mek a ni.

<><><>

State Election Commission chuan vawiin khan district hrang hrang Bawrhap ten Village Council leh Local Council Electoral Roll ennawn tur chu an pisaah theuh an tlangzarh a.

State Election Commission thuchhuahin a tarlan danin nakum, kum 2025 chu village council leh local council inthlan kum a nih avangin inthlan hman tur Electoral Roll dik leh felfai tak nei turin ennawn a ngai a. Vawiina electoral roll tlangzarh tak chu Assembly Electoral Roll nen a inan loh thu leh, hei vang hian Village Council leh Local Council electoral roll a inthun lut tur te, transfer tur leh siamthat ngai nei te chuan anmahni bialtu VLO leh LLO te hnenah tun thla ni 25 atanga thla thar ni 9 chhunga thehluh tur a nih thu tarlan a ni.

State Election Commission in a tlangzarh tak electoral roll-ah te hian Village Council bikah district hrang hrang Aizawl, Lunglei, Serchhip, Champhai, Mamit, Kolasib, Saitual, Khawzawl leh Hnahthialah te vote nei mipa 2,13,434 leh hmeichhia 2,18,734, an vaiin mi 4,32,168 an awm a. Local Council inthlan turah Aizawl Municipal Corporation hnuaiah vote nei mi 2,33,092 leh Lunglei Municipal Council hnuaiah mi 41132, an vaiin mi 2,74,224 an awm a ni.

<><><>

PM DAJGUA

Vawiin khan Aizawl DC Conference Hall-ah Bawrhsap Pu Lalhriatpuia kaihhruaiin Central Scheme thar PM- DAJGUA (Dharti Aaba Janjatiya Gram Utkarsh Abhiyan) chungchang sawiho a ni.

PM-DAJGUA hi Ministry 17 in Tribal mite dinhmun siamthat a, tribal chhungkua leh tribal tam zawkna khua-te, aspirational block-a khuate, tribal population tam tak awmna te, basic facilities hmanga chawikan vek tura thawhona scheme a ni a. Ministry of Tribal Affairs chu Nodal Agency niin Mizoram tana Nodal department chu Social Welfare & Tribal Affairs department a ni.

He scheme hi tribal tamna khaw thlanbikte an intodelhna tura tihchangtlunna tur a ni dawn a. Kum 5 chhung, kum 2024-25 atanga kum 2028-29 thleng kalpui tur niin he Scheme hian India ram chhunga district 549, block 2911 leh khaw 63,843 chhunga tribal mi vaibelchhe 5 leh nuai 38 a huam dawn a. Mizoramah pawh khaw 383-ah hman a ni ang.

Hamthatna dawngtute hi tribal khua a mi 500 emaw a aia tam chenna, a mi cheng zaa 50 tal tribal an ni tur a ni a. Aspirational block chhunga mi 50 emaw a aia tam cheng awmna khua a ni bawk tur a ni. He scheme atan hian Development Action Plan for Scheduled Tribes atangin kum 5 chhung atan India ram pumpui tan cheng vaibelchhe 79,156 ruahhman a ni a. Central leh State Fund sharing hi 90:10 ratio niin, Scheme thenkhatah erawh zaa za central tum tur pawh a tel a ni.

Vawiin thutkhawmah hian Block Level Implementing Team (BLIT) ruat chungchang te, District leh Block level-a Department hrang hrang atanga Nodal officer tur ruat chungchang te, IEC campaign dan tur chungchang te leh Fund leh materials sem dan tur chungchang te rel a ni.

<><><>

MYC

Vawiin khan Mizoram Youth Commission Chairman Pu Malsawmzuala Ralte chuan Mizo thalai 26 state pawna hnathawk turte a thlah.

He hunah hian MYC Chairman chuan fuihna thu sawiin thalaite chu an hnathawhna hmun theuhvah rinawmna nunpui turin a chah a, Pathian tih chung leh inpumpekna tak tak nen, hotute duhsak tlak a hna thawk tura fuihin, midangte tana kawngsat kaw tu an nih anga Mizote tihmingthatu leh Mizo

mipui aiawh an nihnite chu hre reng turin a chah bawk a. Chhel taka awm tur leh mahni inthunun tura fuihin, hlawh hmu tlak ngei a hnathawk theuh turin a fuih bawk a ni.

Thalai te hi MYC leh Honda India Foundation-te tangkawpin an buatsaih Project Buniyaad Hotel Management (Food & Beverages) Training chhuak state pawna hnathawk tur an ni a, Mipa 9 leh Hmeichhia 17 an ni.

Hnathawk turte hi India ram chhung hmun hrang hrang heng: Fairmont(Udaipur) Choki Dhani (Jaipur, Jaisalmer, Indore) Orange Tiger (Goa) Sarvar Hotel (Hyderabad) leh Status Club (Kanpur) ah te an insem darh dawn a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

<><><>

PM IN GUYANA

Prime Minister Narendra Modia chuan hlawhtling taka ram pathum-Nigeria, Brazil leh Guyana te a tlawh hnuin vawiin Khan Delhi a lo thleng.

Prime Minister Narendra Modia hian nizan Khan Guyana Parliament Special Session-ah thu a sawi a. India mi chegte nen hun an hmang bawk. Guyana-a a cham chhungin India_CARICOM Summit vawi 2-na ah a tel bawk a ni. Kan Correspondent report ilo ngaihthlak chhunzawm ang u.

<><><>

MAOIST

Chhatisgarh-ah Maoists hel 10 sipaiten an kaphlum. Thudawn danin inkahna hi Sukma district-a thleng a ni a. Central Reserve Police Force leh District Reserve Guard te hian Konta area-ah hian an thudawn bawhzuiin Maoist dapchhuah beihpui an thlak a. Hemi hnu hian inkahna a thleng zui ta nia thudawn a ni.

Union Home Minister Amit Shah-a chuan Naxal helte chu kum 2026 March thla ral hmain nuai chimih vek a tiam a. Kumin January thla atanga vawiin thlengin Naxal hel mi 257 thah an ni tawh a, mi 861 man tawh niin mi 800 bawr vel sawrkar kutah an inpe tawh a ni.

<><><>

PRESIDENT

President Draupadi Murmu-i chuan hnam ngaihpawimawh hmasakna Nation First chu khua leh tui tinten an pawm a ngai a ti. Vawiina Lok Manthan vawi 4-na a hawannaah President Murmu-i

chuan he thu hi sawiin ram changkanga India siam tur chuan ram thatna tur chu ngaihpawimawh hmasak ber tur a ni a ti.

Lok Manthan hi hnam ziarang chi hrang hrang pholanna niin kuminah hian Hyderabad-ah neih a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 116-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>